

**BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINA SREBRENİK**

NACRT:

**ODLUKA
O IZVRŠAVANJU BUDŽETA OPĆINE SREBRENİK ZA 2011. GODINU**

**OBRAĐIVAČ : Općinska služba za budžet,
poduzetništvo i nadzor**

PREDLAGAČ : Općinski načelnik

RAZMATRA I USVAJA : Općinsko vijeće

Srebrenik, decembar 2010. godine.

Na osnovu člana 5. stav 2. i 38. Zakona o budžetima u Federaciji Bosne i Hercegovine («Službene novine Federacije BiH», broj: 19/06, 76/08, 5/09, 32/09, 51/09, 9/10, 36/10 i 45/10), a u vezi sa članom 13. Zakona o principima lokalne samouprave u Federaciji Bosne i Hercegovine («Sl. novine F BiH», broj: 49/06), i člana 24. Statuta općine Srebrenik («Službeni glasnik općine Srebrenik», broj: 1/08), Općinsko vijeće općine Srebrenik, na sjednici održanoj dana, _____, 2010. godine, d o n o s i:

O D L U K U

O IZVRŠAVANJU BUDŽETA OPĆINE SREBRENİK ZA 2011. GODINU

I - OPĆE ODREDBE

Član 1.

Ovom odlukom uređuje se struktura prihoda i primitaka te rashoda i izdataka Budžeta općine Srebrenik za 2011. godinu (u daljem tekstu: Budžet), njegovo izvršavanje, prioriteta plaćanja, obim, zaduživanja i garancije, upravljanje javnim dugom, prava i obaveze korisnika budžetskih sredstava, ovlaštenja Općinskog načelnika, općinskih službi, kao i druga pitanja u izvršavanju Budžeta za 2011. godinu.

Član 2.

Budžet je akt kojim se utvrđuje plan finansijskih aktivnosti budžetskih korisnika, koji obuhvata projekciju iznosa prihoda i primitaka i utvrđenog iznosa rashoda i izdataka općine Srebrenik (u daljem tekstu: Općina) za razdoblje od jedne fiskalne godine koji donosi Općinsko vijeće Općine Srebrenik (u daljem tekstu: Općinsko vijeće).

Budžet se odnosi na fiskalnu 2011. godinu, koja počinje 01. januara, a završava se 31. decembra 2011. godine.

Član 3.

Svi prihodi i primici, rashodi i izdaci iskazuju se u budžetu na bruto načelu.

Budžet mora biti uravnotežen tako da ukupni prihodi i primici pokrivaju ukupne rashode i izdatke.

Budžetski korisnici mogu preuzeti obaveze na teret budžeta tekuće godine samo za namjene i do visine utvrđene u posebnom dijelu budžeta.

Član 4.

Budžet se sastoji od općeg i posebnog dijela i Programa kapitalnih investicija.

Opći dio Budžeta čini Račun prihoda i rashoda. U računu prihoda iskazuju se i neraspoređeni prihodi iz Budžeta 2010. godinu.

Posebni dio budžeta sastoji se od plana rashoda i izdataka budžetskih korisnika raspoređenih u tekuće i razvojne programe za tekuću budžetsku godinu.

Program kapitalnih investicija čine: Lista kapitalnih projekata iz Strategije razvoja općine Srebrenik za period 2010. godina do 2015. godina, kapitalni projekti iz Programa izgradnje infrastrukture na području općine Srebrenik za 2011. godinu i Programa uređenja gradskog građevinskog zemljišta na području općine Srebrenik za 2011. godinu.

Član 5.

Svi javni prihodi i primici Budžeta, uključujući i prihode koje korisnici budžeta ostvaruju obavljanjem osnovne djelatnosti po posebnim propisima, uplaćuju se na račun javnih prihoda Budžeta Općine i iskazuju po izvorima iz kojih potiču.

Prihodi ostvareni po osnovu Zakona o građevinskom zemljištu («Službene novine FBiH», broj: 67/05) uplaćuju se i evidentiraju na posebnom računu Sredstva za uređenje zemljišta i rente i koriste se za kapitalne izdatke u oblasti komunalne infrastrukture i izradu projektne dokumentacije, u skladu sa Zakonom o prostornom uređenju («Službene novine TK», broj: 03/05).

Član 6.

Budžetsko računovodstvo se zasniva na računovodstvenim načelima: tačnosti, istinitosti, pouzdanosti, sveobuhvatnosti, blagovremenosti i pojedinačnom iskazivanju poslovnih događaja, te na međunarodnim računovodstvenim standardima.

Budžetsko računovodstvo vodi se po načelu dvojnog knjigovodstva i na računima kontnog plana budžeta.

Član 7.

Priznavanje prihoda i primitaka, te rashoda i izdataka putem sistema Glavne knjige provodi se po načelu modificiranog nastanka događaja.

Prihodi i primici priznaju se u onom periodu kada su mjerljivi i raspoloživi, to jest kada su uplaćeni na račun budžeta.

Rashodi i izdaci priznaju se u onom periodu kada je obaveza nastala za plaćanje.

Član 8.

Sredstva budžeta koriste se za finansiranje poslova, funkcija i programa općinskih službi za upravu, stručnih službi, JU Centra za socijalni rad i ostalih čije je finansiranje iz budžeta predviđeno posebnim propisom (u daljem tekstu: Korisnici).

Općinske službe koje u svom budžetskom razdjelu sadrže potrošačke jedinice, budžetski su za njih nadležne.

Član 9.

U cilju javnosti upravljanja javnim novcem Budžet, Odluka o izvršavanju Budžeta, Plan razvojnih programa i ostali dokumenti vezani za izvršavanje Budžeta objavit će se u Službenom glasniku općine Srebrenik, u skladu sa članom 76. Zakona o budžetima u Federaciji Bosne i Hercegovine («Službene novine Federacije BiH», broj: 19/06, 76/08, 5/09, 32/09, 51/09, 9/10, 36/10, 45/10).

II - IZVRŠAVANJE BUDŽETA

Član 10.

Sredstva Budžeta osiguravaju se budžetskim korisnicima koji su u Posebnom dijelu Budžeta određeni za nosioce sredstava na pojedinim pozicijama.

Korisnici koriste budžetska sredstva samo za namjene koje su određene Budžetom, i to do visine utvrđene u njegovom Posebnom dijelu.

Namjenske donacije i grantovi koji nisu planirani u budžetu, a ostvare se u toku fiskalne godine namjenski će se usmjeravati Zaključkom Općinskog načelnika o čemu će se izvijestiti

Općinsko vijeće prilikom izrade Rebalansa budžeta ili podnošenjem Izvještaja o izvršenju budžeta.

Član 11.

Korisnici koriste sredstva Budžeta u skladu sa planom Budžeta, vodeći računa da dinamika ostvarenja budžetskih prihoda određuje okvir trošenja budžetskih sredstava a što znači ukoliko nema naplate bužetskih prihoda u skladu sa planom Budžeta, nema ni doznačavanja sredstava korisnicima u skladu sa planom Budžeta.

Član 12.

Budžet općine izvršava se u skladu sa njegovim likvidnim mogućnostima po sljedećim prioritetima:

- otplata duga i kamata po kreditima,
- grantovi za jednokratne pomoći u oblasti socijalne i boračko invalidske zaštite,
- plaće i naknade zaposlenih,
- naknade za rad u Općinskom vijeću i radnim tijelima Općinskog vijeća,
- obaveze po zaključenim ugovorima

Ostala izdvajanja planirana u Budžetu će se isplaćivati u skladu sa likvidnim mogućnostima Budžeta o čemu će odlučivati Općinski načelnik.

U slučaju poremećene likvidnosti budžeta, Općinski načelnik poduzima mjere za uravnoteženje budžeta i izmjene i dopune budžeta.

Član 13.

Općinski načelnik je naredbodavac za raspodjelu i utrošak sredstva utvrđenih u Posebnom dijelu Budžeta.

Član 14.

Općinski načelnik može izvršiti pozajmicu sredstava, sa računa Sredstva za uređenje zemljišta i rentu u slučaju nedostajućih sredstava na računu Budžeta.

Član 15.

Postupak nabavke roba, usluga i ustupanja radova mora se obavljati u skladu sa Zakonom o javnim nabavkama BiH («Službeni glasnik BiH», broj: 49/04, 19/05, 52/05, 08/06, 24/06, 70/06 i 12/09) i Pravilnikom o nabavci roba, vršenju usluga i ustupanju radova («Službeni glasnik općine Srebrenik», broj: 4/05, 6/05 i 2/06).

Član 16.

Hitni i nepredviđeni izdaci koji se pojave u toku budžetske godine podmiruju se iz sredstava tekuće rezerve utvrđenih u Budžetu.

O korištenju sredstava tekuće rezerve, na osnovu zahtjeva odlučuje Općinski načelnik, a po dobijanju prijedloga Službe za budžet, poduzetništvo i nadzor.

Služba za budžet, poduzetništvo i nadzor će dostaviti prijedlog Općinskom načelniku na osnovu pribavljenog mišljenja nadležne Službe o opravdanosti predmetnog zahtjeva.

Općinski načelnik može odobriti isplatu sredstava iz tekuće rezerve do 500,00 KM bez prijedloga Službe.

Budžetsko izdvajanje za tekuću rezervu ne smije preći 3 % ukupnih prihoda, isključujući primitke.

Služba za budžet, poduzetništvo i nadzor obavezna je tromjesečno izvještavati Općinskog načelnika o korištenju sredstava tekuće rezerve.

Općinski načelnik polugodišnje izvještava Općinsko vijeće o korištenju sredstava tekuće rezerve.

Član 17.

Platni promet vršit će se putem otvorenih transakcijskih računa.

Član 18.

Općinski načelnik može na prijedlog budžetskog korisnika, uz pribavljeno mišljenje Službe za budžet, poduzetništvo i nadzor, donijeti Odluku o prestrukturiranju rashoda u okviru ukupnog iznosa odobrenog za budžetskog korisnika, a najviše do 10 % ukupno odobrenih rashoda za budžetskog korisnika.

U okviru odobrenog Budžeta, preraspodjela sredstava je dozvoljena između budžetskih korisnika.

O preraspodjeli iz prethodnog stava odlučuje Općinski načelnik.

Član 19.

Pogrešno ili više uplaćeni javni prihodi, vraćaju se uplatiocima iz sredstava Budžeta u skladu sa odredbama Pravilnika o načinu uplate javnih prihoda budžeta i vanbudžetskih fondova na teritoriji Federacije BiH («Službene novine F BiH», broj: 41/09, 46/09, 56/09 i 63/09) i upravnog akta (Rješenje ili Zaključak) nadležnih općinskih službi koje vode postupak o opravdanosti i odobravanju povrata više ili pogrešno uplaćenih javnih prihoda.

Član 20.

Sredstva utvrđena u Budžetu za isplatu naknada za rad u Općinskom vijeću i u radnim tijelima Općinskog vijeća isplaćuju se na osnovu Odluke o naknadama vijećnika Općinskog vijeća Srebrenik, njegovih organa i tijela, kolegija općinskog vijeća, stalnih i povremenih komisija koje bira ili imenuje Općinsko vijeće («Službeni glasnik općine Srebrenik», broj: 11/06).

Član 21.

Sredstva utvrđena u Budžetu za isplatu plaća Općinskom načelniku, Sekretaru općinskog vijeća i Općinskom pravobranioču isplaćuju se na osnovu Odluke o utvrđivanju plaća i naknada funkcionera koje bira ili imenuje Općinsko vijeće općine Srebrenik («Službeni glasnik općine Srebrenik», broj: 1/03, 9/05 i 6/07), a zaposlenim u Službama za upravu Općine Srebrenik isplaćuju se na osnovu Odluke o utvrđivanju platnih razreda i koeficijenata za plaće rukovodećih i ostalih državnih službenika i namještenika u organima državne službe Općine Srebrenik («Službeni glasnik općine Srebrenik», broj: 6/07), Rješenja koje donosi Općinski načelnik, Sekretar općinskog vijeća, Općinski pravobranilac.

Član 22.

Sredstva utvrđena za finansiranje rada parlamentarnih klubova realizuju se u skladu sa Odlukom o raspodjeli novčanih sredstava Budžeta za finansiranje klubova i vijećnika političkih stranaka zastupljenih u Općinskom vijeću Općine Srebrenik («Službeni glasnik općine Srebrenik», broj: 5/10).

Član 23.

Sredstva utvrđena u Budžetu općine Srebrenik na pozicijama:

1. Općinska izborna komisija,
2. Novčane naknade nezaposlenim licima,
3. Podsticaj poljoprivrednoj proizvodnji,
4. Veterinarskoj stanici Srebrenik - Po programu preventivne zaštite životinja,
5. Izdaci za RVI, članove porodica poginulih boraca i demobilisane pripadnike OS RBiH
6. Isplate stipendija i kredita,
7. Ostali grantovi pojedincima kod Službe BIZ-a
8. Rješavanje stambenih pitanja boračkih populacija,

koriste se na osnovu Odluka, Programa, Pravilnika, Zaključaka i Planova koje donosi Općinsko vijeće.

Član 24.

Sredstva utvrđena u Budžetu općine Srebrenik na pozicijama:

1. Pomoći po zahtjevima,
2. Pomoć za raseljena lica i pomoć za održivi povratak,
3. «OGUS“, Dani povelje i ostale kulturne manifestacije»,
4. Razna udruženja i mladi,
5. Ostali izdaci za informisanje,
6. Sredstva za finansiranje vjerskih zajednica,
7. Sredstva za finansiranje rada Mjesnih zajednica,
8. Unajmljivanje prostora,
9. Obilježavanje godišnjica i memorijalnih datuma
10. Kapitalni grantovi Mjesnim zajednicama,
11. Sportski klubovi,
12. Razvoj sporta na općini Srebrenik,
13. Razvoj lova i turizma,
14. Izdaci za izgradnju, rekonstrukciju i održavanje spomen obilježja i Spomen kosturnice borcima NOR-a 1941 - 1945 g.
15. Namjenska sredstva za zaštitu od prirodnih i drugih nesreća,

koriste se na osnovu Programa i Odluka o utvrđivanju kriterija i postupka dodjele sredstava za finansiranje usvojenih od strane Općinskog načelnika a na prijedlog nadležnih službi.

Član 25.

Korisnici budžetskih sredstava iz prethodnog člana obavezni su mjesečno odnosno po završetku projekta izvještavati nadležnu općinsku Službu o utrošenim sredstvima.

Uslov za isplatu sredstava iz stava 1. ovog člana jeste pravdanje utroška eventualno korištenih sredstva iz Budžeta za 2010. godinu.

Član 26.

Sredstva utvrđena u Budžetu općine Srebrenik kao «Kapitalni izdaci» i ulaganja u komunalnu infrastrukturu koriste se na osnovu Programa kapitalnih investicija za 2010.-2015. godinu, Programa izgradnje infrastrukture na području općine Srebrenik za 2011. godinu i Programa uređenja gradskog građevinskog zemljišta na području općine Srebrenik za 2011. godinu, a nadležne Službe o realizaciji istih podnose Izvještaj Općinskom vijeću.

Sredstva utvrđena u budžetu općine Srebrenik kao kapitalni grantovi će općinski načelnik namjenski odobravati na zahtjev korisnika sredstava a koji je prethodno proveo proceduru u skladu sa Zakonom o javnim nabavkama.

Član 27.

Općina može izdati garanciju za finansiranje kapitalnih investicija samo pod uslovom da je pravno lice koje je zajmoprimac sredstava pravno lice čiji je većinski vlasnik općina ili je pod nadzorom općine, a Odluku o odobravanju izdavanja garancije donosi Općinsko vijeće, a garanciju potpisuje Općinski načelnik.

Ugovor o regulisanju međusobnih odnosa za izdatu garanciju sa zajmoprimcem potpisuje Općinski načelnik.

III - FINANSIJSKO IZVJEŠTAVANJE

Član 28.

Služba za budžet, poduzetništvo i nadzor dužna je podnositi Općinskom načelniku mjesečne finansijske izvještaje u roku od najviše 30 dana, a tromjesečne i polugodišnje finansijske izvještaje u roku od najviše 60 dana od dana završetka svakog izvještajnog razdoblja.

Član 29.

Služba za budžet, poduzetništvo i nadzor obavezna je dostaviti Općinskom načelniku Izvještaj o izvršenju Budžeta za prethodnu godinu, a Općinski načelnik je obavezan podnijeti isti Općinskom vijeću na usvajanje u roku od šest mjeseci od završetka fiskalne godine.

IV - ZAVRŠNE ODREDBE

Član 30.

Na sva pitanja koja nisu regulisana ovom Odlukom, a tiču se načina izrade, donošenja, izvršavanja Budžeta, zaduživanja, duga, računovodstva, nadzora i revizije Budžeta primjenjivat će se odredbe važećih zakona.

Član 31.

Odluka o izvršavanju budžeta općine Srebrenik za 2011. godinu objavit će se u «Službenom glasniku općine Srebrenik», a važi za fiskalnu 2011. godinu.

**BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINA SREBRENİK
Općinsko vijeće**

**PREDSJEDAVAJUĆI
OPĆINSKOG VIJEĆA**

Prim. dr. Ibrahim Zukić

**Broj: 01- _____/10.
Srebrenik, _____ 2010. godine.**